



wantok

Niuspepa bilong ol Papua Niugini stret

NESENEL

Namba 204

Bilong wik i stat long Sarere, 4 Februeri 1978

Prais 10t.

TUPELA WINA



Poto long lephan i soim
Mis Margaret Kila na Mista
Micka Turalom.

Mis Kila em i namba
wan hostes bilong Air Niugini
long dispela yia. Ol
117 hostes yet i bin votim
em namba wan bilong ol.
Long poto hia em i holim
wanpela prais em i bin kis-
im long han bilong Sir
Tore Lokoloko, gavana
janeral bilong P.N.G.

Mis Kila em i gat 20
krismas na i kam long viles
Hula long Sentral Provins.
Em i bin wok klostu tu yia
long Air Niugini.

Mista Micka Turalom
em nau i bosim Air Niugini
Ofis long Alotau long
Milne Be Provins.

Mista Turalom em i gat
29 krismas na i kam-long
ples Putanagororoi klostu
long Rabaul. Em i marit
na i gat 2-pela pikinini
meri.

Em i skul long Keravat
na i kirapim wok bilong
trefik ofisa wantaim TAA
long Lae long 1976. Taim
Air Niugini i stat em i kis-
im namba bilong sinia tre-
fik ofisa long Lae. Bipo
em i kisim dispela nupela
wok long Lae em i trefik
ofisa long Madang.

Veronika Williams
potoim tupela.



Matane bosim miting bilong ol Esia

Insait long Yunaitet Nesens long Amerika, tokman bilong PNG, em Mista Paulias Matane, i kamap siaman bilong miting namba 32 bilong ol kantri bilong Esia.

Long toktok bilong em, Mista Matane, i laik strong-im bel bilong ol kantri insait long Yunaitet Nesens long putim bikpela tambu long olkain gan na katres na bom samting i no ken go long kantri Saut Afrika, long wanem ol waitman long en i krungutim ol blakman.

Mista Matane i tok, yumi olgeta i mas orait long dispela tambu na i no ken salim samting long Saut Afrika. Tasol sapos sampe-la i tingting long winim mani tasol, na i wok bisnis wantaim Saut Afrika, dispela i bagarapim tambu bilong yumi olgeta. Mobe-ta yumi strong na wok wantaim, olsem tasol yumi inap senisim tingting bilong ol.

Mista Matane laik lukim

yet bai olgeta kantri i bi-hainim gutpela pasin bilong mekim gut long ol meri, na i no yusim ol olsem wokmeri tasol. Ol meri i pipel wankain olsem ol man.

Na tu em i hepi long lukim Amerika na Frans na Englan i wok long givim independens long ol teritori bilong ol nau.

Bikpela wari bilong em yet, olsem wanem yumi ken mekim save na pinisim dispela pasin bilong sampe-la manmeri nogut i stilim ol bikpela balus i pulap long ol pipel, taim ol i flai yet.

Yunaitet Nesens poto long raithan i soim kain skwata blakskin i stap long Saut Afrika.





LO BILONG SAMPELA ARAPELA KANTRI

Sampela taim yumi save harim sampela manmeri i tok egens long ol lo bilong Papua Niugini. Tude mi laik poromanim ol dispela kain pipel i go wantaim mi na i lukim sampela lo bilong sampela arapela kantri. Bihain bai ol i no gat tok moa.

Yumi go lukim sampela ol Arab kantri long Not bilong Afrika. Sampela kantri olsem: Isip, Saudi Arabia, Not Yemen, Oman, Katar, Libya. Ol dispela kantri i bihainim lotu bilong ol Islam o Muslim. Na ol i strong long bilipim tru Baibel bilong ol, em ol i kolim Koran.

Asde yet mi bin painim sampela stori long wanpela niuspepa bilong Jemani. Ol i toksave long ol pasin bilong lo long ol dispela Arab kantri. Em pasin bilong wipim kalabushman, katim han, lek, stonim man, hangamapim em long diwai kros, na rausim tang bilong em.

Ol i raitim sampela eksampel. Wanpela man i pilai nabaut long ol waitskin meri. Ol i paitim em 100 taim. Wanpela meri i salim strongpela dring long haus bilong em. Strafe bilong em: paitim em long wip 50 taim.

Long Saudi Arabia 3-pela man i pasim wanpela yangpela meri na i pilai long en. Wanpela i singel boi: olsem na gavman i marimari long em (ol yet i tok olsem) na i katim nek bilong em. Tupela maritman i dai olsem: ol plisman i planim tupela long graun inap long as bilong tupela, bihain ol i tromoim ston na paitim inap tupela i dai. Tupela i mas indai bikos tupela i brukim marit.

Long narapela kantri 2-pela ami ofisa, 12-pela plis ofisa, na 200 arapela man i kisim strafe o bekim long "han bilong Got" - olsem ol Islam i save tok. Ol i wipim ol long hap baklain i gat buk long en.

Jeneral Zia Ul-Haq, hetman bilong narapela Muslim kantri, i amamas bikos long han bilong em yet, em i save katim han na lek bilong ol stilman.

Tude yet long kantri Isip sapos man i dringim strongpela dring i gat alkohol, em inap lusim laip bilong em. Presiden Anwar El Sadat, hetman bilong Isip, nau tasol i redim wanpela lo i tok olsem: Sapos wanpela Isip i lusim lotu Islam na i kamap Komunis o i kamap Kristen, bai yumi mas katim nek bilong em.

Em nau. Yu ting wanem nau long lo bilong PNG i bihainim Kristen tingting?

OL WANSOLWARA MANGALIM PNG

Fopela bikpela man bilong politik bilong kantri wans olwara Nu Hebrides i bin kamap long Port Moresby long Fraide, 27 Janueri, bilong lukim na toktok wantaim ol lida bilong PNG gavman.

Ol i bin kam bilong kisim sampela save long pasin bilong divelopmen na independens. Ol i bin toktok wantaim Praim Minista Michael Somare, Mista Barry Holloway, Mista Boyamo Sali, na Mista Pita Lus. Na tu ol i bin bungim sampela sinia pablik sevan.

Kantri Nu Hebrides i no kisim independens yet. Ol i kisim selp gavman tasol. Ol i ting bai ol i winim independens long yia 1980. Ol i stap yet aninit long

gavman bilong Englan na Frans. Ol lokal pipel i wok long tok kros na pait politik wantaim 2-pela kantri yet.

(I go moa long pes 9)

Poto daunbilo i soim long lephan Mista Adrian Malene, Mista Luke Dini, Sif Minista George Kalskau, Pater Gerard Leymang.



LUTERAN SINOD

Long namba tri wik bilong mun Janueri, Evanjelikal Lutheran Sios bilong Papua Niugini (ELC-PNG) i bin mekim bikpela kibung Sinod bilong em long Heldsbach, Finschhafen long Morobe Provins.

Sinod i bin kibung long wanpela wik olgeta, stat long namba 16 de inap long 21 de bilong Janueri. Dispela Lutheran Sinod i save kamap wanpela taim long tupela yia. Moa long 267 deliget i bin stap long dispela kibung. Ol dispela deliget i makim olgeta Seket bilong Lutheran Sios long Morobe, Madang, Goroka, Simbu, Hagen, Port Moresby na planti arapela liklik hap ples we Lutheran Sios i gat misin.

Bisop bilong Evanjelikal Lutheran Sios long Papua Niugini, Bisop Zurewe Zurenuo, i siaman long dispela Sinod. Sampela bikman bilong Lutheran Sios long Jemani, Amerika na Kanada, ol i bin stap tu wantaim long dispela sinod. Wanpela long ol visita ya em long Dokta Karl Mau, em Eksekutiv Seketeri long Lutheran World Federation long Geneva, Swiserlan.

As tingting bilong dispela sinod ol i bin kolim long: "Goaut na skulim ol

pipel". Dispela hap tok i kam long Baibel, long Gut Nius bilong Matyu 28:19, 20 we Jisas i tokim ol disaipel bilong em olsem: "Yupela i go mekim olgeta lain rhanmeri i kamap disaipel bilong mi. Na Yupela lainim ol long bihainim olgeta tok mi bin givim long yupela."

Ol deliget i bin wokim planti Baibel stadi long dispela toktok bilong Jisas. Ol i laik painim we bilong mekim dispela hap tok i ken pas wantaim wok misin bilong Sios long wok

edukesen, egrikalsa, helt, na gutpela pasin sindaun bilong ol pipel. Ol i bin toktok tu long olkain we dispela wok misin i ken helpim ol pipel long ol as ples, na long ol bik taun na ol skul na olgeta wok misin long graun.

Sinod i bin harim tu ol ripot i kam long ol kain kain komiti na dipatmen i wok insait long Lutheran sios. Ol ripot i bin toktok long wok bilong medikal na helt sevis, edukesen na trening bilong ol (i go moa long pes 6)

LAIK AMAMAS LONG KALABUS

Dia Edita - Hia nau mi laik bekim pas bilong wantok hia Johannes Kundal long Westen Hailans Provins. Yes wantok yu bin lukim hevi i stap insait long haus kalabus long Baisu, na yu autim wari bilong yu. Tasol, yu tok long gavman i mas saplain planti kaikai long ol haus kalabus na ol kalabusman i no ken hangre na i no ken indai long hangre.

Yes, wantok, yu kristen man, orait yu mas lusim trabel, Nogut yu tu yu harim kristen nating long maus na yu kolim kristen long maus tasol. Na yu yet i no lukluk long yu yet na yu givim stia long arapela em i no stret bilong wanem na mi tok olsem.

Yupela man bilong Hagen, yupela man bilong trabel tru. Insait long yia na mun na wik, yupela i no save malolo liklik long paat. Na tu yupela i givim bikpela hatwok long gavman bilong yumi tu long stretim gut sindaun bilong yupela.

Na tu yu trikimi ol man i go i stap long kalabus. Ol plisman i kam kalabusim yu, o yu yet kalabusim yu yet, yu mas sklim gut dispela. Yu yet yu bikhet, yu yet yu kalabusim yu yet. Olsem na gavman i no givim kaikai long yu long haus kalabus na yu indai long hangre, em asua bilong yu yet.

Sapos wanpela man o meri i dai long haus kalabus long hangre, orait gavman i no kilim yu indai. Yu yet kilim yu indai. Olsem na i no gat tok long dispela, indai tasol i go. Hei, wantok, gavman i redim planti kaikai long Baisu haus kalabus na yu i go het long trabel. Na yu mekim trabel pinis na i go kalabus na yu ting bai yu i stap amamas long haus kalabus na yu ting bai yu i stap amamas long haus kalabus a? Na yu kisim planti kaikai long haus kalabus?

Sori, wantok, yu wok long gavman em bambai i givim planti kaikai na yu inap pulap. Tasol kalabus em yu bekim rong bilong yu. Olsem na sapos yu lukim kain hevi i kamap long hap bilong yu, orait, yu lukim dispela na yu no ken mekim trabel.

F. Suruba Yalali,
Lae.

STRETIM MISIN

Dia Edita,

Mi laik autim wanpela wari bilong mi. Mi bin lukim wanpela pasin long Sauten Hailans. Ol misin i kam skulim ol pipel olsem, ol i tambu long bilas na tambu long skin diwai na tambu long het bilum. Na skulim pipel long putim long trausis tasol.

Na ol pipel ol i no save long senisim ol klos na ol i mekim hat wok stret. Na taim ol manmeri baim wanpela trausis na wanpela siot na ol i werim na ol i wokim gaden na mekim wok hat na tuhat i stap. O taim bilong ren, wet i stap yet, ol i no gat save long senisim ol klos. Na wet yet, ol i kam slip, na ol i save painim sik tu.

Ol misin yet i skulim pipel kranksi na taim bilong Independens na taim bilong Krismas samting ol i tambu long givim ona long gavman bilong yumi. Olsem na mi askim yupela ol brata bilong PNG. Ol sampela misin i tok sapos yu bilas em bai yu kisim sin. Sapos yu kaikai pik, sin. Na go long maket, sin. Yu, planim kopi, sin. Tasol i no dispela samting mekim sin.

Rot bilong sin em arapela. Dispela toktok mi raitim na yupela ol bikman bilong gavman tu, mas stretim dispela kranksi tingting bilong sampela misin.

Mi Andrias Ameya,
Kagua,
S.H.P.

BUAI SAVE KLIAM AI

Dia Edita - Nau mi laik sapotim toktok bilong buai ol 7-pela man long Arawa Taun, ol i bin rait long de namba 5 bilong mun Novemba 1977. Mi bin ritim olgeta stoi bilong ol na em i tru tumas.

Bipo tumbuna bilong yumi ol i mekim olsem. Ol i gat liklik bilum long nek bilong ol, na i gat kambang na buai, daka, smok, brus.

Na taim ol pren bilong ol i stap olsem long Nadzab na ol narapela pren em kirap long Butibam na i laik go lukim pren hia long Nadzab. Tasol pren ya em i go i kamap. Tasol mitupela i sindaun nating bambai ai bilong mitupela bai slip. Na sapos mi man bilong Nadzab mi kisim buai na daka na kambang long liklik bilum bilong mi na mi givim long pren hia. Na mitupela kaikai na stori bai ai bilong mitupela i klia.

Em stori bilong tumbuna pasin. Na i no inap rausim buai. Yu man i komplek tumas long buai yu mas tingim gut pastaim.

Mi bilong Wara Bena Bena, E.H.P.

Terry Nemeke,
Bena Bena/E.H.P.

HAILANS MAN NO LAIKIM BUAI

Dia Edita - Long dispela pas mi laik autim liklik wari bilong mi olsem. Mi bin lukim olgeta hap long Papua Niugini em i gutpela siti taun tasol.

Mi lukim hia long Port Moresby siti i no stret tru. Na kantri bilong yumi i orait liklik, tasol yumi pipel yet bagarapim siti bilong yumi.

Em i olsem pulimapim buai tumas long maus

bilong yupela na spet nabaut long stua o liklik haus kaikai bilong yumi. Na tu long ol i bin putim buai spet long maketples bilong putim kaikai na sindaun long en.

Na mi lukim olkain simbu tasol kaikai buai tumas na bagarapim 4 mail. stua o haus kaikai bilong PNG.

Plis, em wanpela mi no laikim tru. Ating no gat siti kansil hia. Em tasol.

John Opi
Mendi S.H.P.

NO LAIKIM STORI TUMBUNA

Dia Edita - Mi laik autim liklik wari bilong mi. Wari bilong mi bai i go olsem. Mi bilong Lae na mi i stap insait tasol long Lae siti long Morobe Provins. Dispela Wantok Niuspepa em i no raitim long tingting bilong mi o laik bilong mi, nogat.

Harim ol wantok, mipela man bilong ranim wok bisnis i go het long pasin tumbuna o kastam bilong tumbuna? Olsem na mipela i no laik tru long harim tumbuna stori moa long Redio Morobe.

Sapos yu laik mekim tumbuna stori, orait yu ken stori long pikinini bilong yu, na liklik tumbuna bilong yu, na brata, kandere bilong yu long viles bilong yupela yet o haus bilong yupela yet na ol i ken stori long tumbuna bilong ol.

Harim, ol wantok, yupela i no ken bringim tumbuna stori long redio. Redio em i samting bilong pablik laka.

Em tasol liklik wari bilong mipela. Tenkyu.

Gawalio Selak,
Lae.

OL SONG I GAT TOK NOGUT

Dia Edita - Mi wanpela skul meri hia long Natre Dame Girls High Skul. Na mi gat wanpela wari i stap na mi na ol wanskul bilong mi, mipela ting i no stret tru.

Mi tu i ting ol narapela man i ting olsem tu. Wari bilong mi i olsem:

Olgeta taim mi save harim i stap long ol redio stesin na ol sampela singsing i rabis tru. Yupela redio stesin i save pilaim ol kain song tasol sampela i rabis tru. Em sampela song we al string ben grup i save singsing na pilai long en. Tasol sampela redio stesin i no save isi long pilaim dispela kain song: "Susu bilong yu i pilo bilong mi". Yupela man i save singsing long en, ting em wanem kain singsing tru.

Long tingting bilong mipela dispela i rabis tru, em i no gutpela tru.

Mi yet na ol wanskul bilong mi i no laikim ol redio stesin long pilaim dispela kain singsing. Yupela save wanem singsing i gutpela na wanem i rabis. Sapos ol man i rait i askim long dispela kain song yu redio stesin no ken pilaim.

Em tasol liklik wari bilong mi.

Elise Kiue K.
Mt. Hagen.

SALIM OL
PAS I KAM
LONG:

WANTOK
BOX 1982
BOROKO

NIUS BILONG OL MERI



Veronica Williams Poto.

OL HOSTES WINIM SKUL

Poto antap i soim 17 nupela hostes i bin winim skul bilong ol long Air Niugini long de namba 19 bilong mun Janueri. Ol i poto hia wantaim namba wan hostes bilong ol, em Mis Margaret Kila.

Stat long lain antap na kirap long lephan na yu ken lukim: Claire Moatsy (N. Solomons), Phillis Haoda (Westen), Siliba Buyo (Morobe), Penny Mai (Galp), Jane Lokes (Manus), Hagen James (Galp), Norah Paul (Sentral), Sally Bilitaria (Is Nu Briten), Passi Avosa (Galp).

Long lain long namel yu ken lukim: Mary Kilie (Not Solomons), Kathy Tapas (Manus), Margatet Kila (Sentral), Betty Rugei (Madang), Gemma Kwarara (Sentral), Anna Kalina (IsSepik).

Long lain daunbilo em hia: Ano Aoda (Sentral), Marie Beni (Sentral), Lina Damwat (Is Sepik).

PREN BILONG YU INAP OLTAIM


SALI SKULIM SINOD

Mista Boyamo Sali, Memba bilong Morobe Provinsal Iektoret na Minista bilong ol Bus na Graun i tokaut strong long Evenjelikal Luteran Sios long sampela olupela tingting na pasin na wok bilong Sios.

Mista Sali yet em i Luteran na i deliget long Sinod bilong ol na i bin autim tingting bilong em long dispela samting bihain long kibung i pinis.

Mista Sali i bin tok, Luteran Sios i mas senisim konstitusen bilong em, long wanem, em i tok, sampela as tingting na aidia insait long dispela konstitusen i olupela pinis, na i no moa pas wantaim ol nupela laik na tingting bilong ol pipel tude. Em i tok dispela olupela konstitusen i pulap long aidia bilong ol Yuropien pipel na i no pas wantaim ol nupela aidia bilong developmen bilong ol Papua Niugini.

Mista Sali i tok long dispela samting tasol na planti yangpela pipel long PNG i no laik stap insait long sios. Em i tok, ol yangpela pipel i no pilim olsem sios i gat wari na laik long ol. Ol i ting olsem sios i laikim ol bikpela man tasol. Mista Sali i tok em i laik lukim planti moa yangpela man na meri i kam insait long ol kibung bilong sios.



Mista Boyamo Sali, M.P.

Mista Sali i tok, sios i mas senisim sampela tingting na pasin bilong em sapos em i laik pulim laik na sapot bilong ol yangpela man na meri. Em i tok planti yangpela man na meri long dispela taim i no amamas tumas long stap klostu wantaim ol wok misin.

Mista Sali i tok, ol lida bilong sios na gavman i mas wok gut wantaim bilong painimaut gutpela

nupela we bilong pulim bek bel bilong ol yangpela pipel long ol wok developmen bilong ol misin. I gutpela sapos gavman na sios tupela wantaim i bihainim Kristen tingting long wok bilong tupela. Sapos olgeta pipel bilong yumi i kamap gutpela kristen, ol lida bilong yumi bai kamap gutpela man tu. Sapos ol pipel bilong yumi i nogut, ol lida bilong yumi tu bai i no inap kamap gutpela man.

SMATPELA AIDIA


Dispela stori em i bilong misin stesin long Not Solomons, nem bilong em Piano.

I no longtaim i go pinis na Pater bilong dispela peris i kisim nupela wok na nau Piano Peris Kaunsil, i lukautim dispela misin stesin. Wapela man bilong dispela kaunsil, em Mista Edward Okuau, i lukim bikpela gras i karamapim stesin olgeta na no inap bai ol i sarapim. Ol i mas gat wapela pawa mowa olsem bipo. Tasol mani bilong baim bai kamap we?

Mista Okuau i ting long askim ol yangpela pipel bilong Piano peris em ol i wok nabaut long gavman na kampani long Solomons - bai ol yet i mas bungim mani bilong baim dispela pawa mowa. Edward i bin painimaut i gat 41 manmeri bilong peris bilong em, i save holim gutpela wok na kisim gutpela pe. Em 7-pela i stap long Toniva, 7-pela long Arawa, 3-pela long Lolero, 4-pela long Nairovi, na 27 long Panguna.

Mista Okuau wantaim Saimon Kauney (siaman bilong peris kaunsil) na Lainus Konukum - i kirapim tingting long statim wapela Asosiesen bilong ol wokman i bilong ples Piano. Ol i mas helpim peris bilong ol. Miting i tok, wan wan wokmanmeri i mas givim K10.00 long peris bilong em.

Dispela Asosiesen bi-



Mista Edward Okuau

long ol Wokman bai helpim peris kaunsil long lukautim gut graun bilong misin stesen, na tu long wokim haus lotu na haus pater na haus sister. Sampela tisa i tasol kolim Piano i as ples bilong ol, ol i bin salim mani tu i kam. Ol i amamas long insait long Asosiesen.

SINOD

(i kam long pes 3)

evanjelis, skul bilong nesing, skul bilong edukesen, Yangpela Didiman, na arapela kain wok bilong Luteran misin. Dispela sinod tu i bin makim 4-pela nupela Dairekta long 4-pela dipatmen bilong sios. Nem bilong ol hia: Pasto Yanadabing Apo i kamap olsem hetman bilong dipatmen bilong bosim wok na trening bilong ol evanjelis. Em i kamap tu namba tu bilong Bisop. Mista Saki Ronu i kamap olsem Dairekta bilong Edukesen. Mista Don Ruthenburg i kamap olsem Dairekta bilong fa-nens. Mista Ken Cramer i kamap olsem Dairekta bilong ol helt wok.

Sinod tu i bin makim gen Zurewe Zurenuo bai stap olsem het bisop bilong Luteran Sios long Papua Niugini inap 4-pela yia moa.

Long pinis bilong kibung dispela Sinod i bin strongim gen han bilong ol evanjelis na edukesen dipatmen bai tupela dipatmen ya i mas ranim gut wok bilong tupela na bihainim oltaim dispela rot long Gutn bilong Matyu, em i tok sem: "Yupela i go na l'im ol."



BS BRIDGESTONE

LUKIM DISPELA MAK
EM I MAK BILONG

Namba Wan Taia

Bilong P.N.G.


N.G.G. TRADING COMPANY
P.O. BOX 459,
LAE,
PH. 42 3122

Indonesia
lusim
10,000
kalabus

Long mun Desemba, 1977, gavman bilong Indonesia i lusim 10,000 kalabusman i bin stap inap long 12 yia long kalabus, bikos ol i helpim Komunis Pati long taim em i traim kapsaitim gavman bilong Indonesia long yia 1965.

Planti long dispela ol kalabusman i bin stap long ailan Buru na sampela i mas sel inap long wik stret long kamap long as ples bilong ol.

As bilong trabel em hia: long nait, bilong 30 Septemba 1965 Komunis Pati bilong Indonesia i bin traim kapsaitim gavman bilong Presiden Sukarno. Komunis Pati long Indonesia long dispela taim i gat 3 milion memba bilong en na isi isi em i stat long bosim ol bikpela man insait



long gavman. Olsem long dispela nait sampela man i save lukaut long Presiden Sukarno yet i kirap, holimpasim na kilim indai 6-pela bikpela jeneral long Ami. I luk olsem ol Komunis i bin tokim ol olsem, bai ol i kisim gavman long han bilong ol. Sampela arapela man i tok, i no samting bilong ol Komunis. Em ol jeneral yet i kirap paët namel long

ol.

Wanpela jeneral ol i no bin kilim indai, bihain em i kamap namba wan lida bilong kantri, em Jeneral Suharto.

Nau bikpela paët i kamap insait long Indonesia namel long gavman na ol Komunis. Jeneral Suharto i kisim pawa na bosim dispela part. Bihain long yia em i kamap presiden


bilong Indonesia.

Long dispela taim bilong paët, gavman i kros na i putim bikpela hevi long olgeta pipel i Komunis o i belgut long ol Komunis o i bin helpim ol. Samting olsem 500,000 pipel i lusim laip bilong ol long dispela taim. Na samting olsem 600,000 i kalabus. Gavman i wokim sampela bikpela kalabus kem nabaut long kantri, na kalabusim

ol pipel longwe long ples. Planti i stap long kalabus inap nau. Gavman i bin promis bai ol i lusim nara-pela 10,000 kalabusman long 1978.

Wanpela bikpela asosiesen i save wari long ol kalabusman long graun i tok, tude yet insait long Indonesia i gat samting ol-

(i go moa long pes 12)



Strong Tru.

HUSKY DYNA

Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.

TOYOTA

ANCHES PORT MORESBY LAE MT. HAGEN
25 4088 42 2322 52 1888

ELA MOTORS LIMITED

MADANG
82 2188

RABAUL
92 1988

KIETA
95 6083

WEWAK
86 2255

GSP ET 013P

ol skwata gat wanem wari

Long mun Septemba yet ol tokman bilong olgeta sios long Port Moresby i bin kibung na pasim tingting long ol wari bilong wok wantaim ol kain kain pipel insait long bik siti. Planti saveman bilong planti dipatmen bilong ol sios na gavman i bin sindaun toktok wantaim, na skulim ol deliget long save bilong ol. Na ol i bin autim sampela gutpela aidia na tu sampela kain tingting yumi no save harim kwiktaim.

Mista Kuri Dom bilong Moresby Komyuniti Developmen Senta i bin givim skul long ol wari bilong ol skwata nabaut long biktaun Port Moresby. Bikos tude i gat planti tok long ol skwata i stap nabaut long ol bikpela taun, ating i gutpela yumi harim sampela wari bilong ol skwata na olsem wanem ol i save painim trabel isi tumas.

(1) Ol haus bilong ol skwata i rabis na i pulap long pipel. Olsem sik i save kalap kwiktaim long ol arapela pipel i slip long wanpela haus. Ol dispela kain haus tu i save paia isi tumas na kukim planti haus wantaim.

(2) Pasin bilong wokim blak maket long salim bia long nait i save kamap isi moa. Em i bikos planti plis skwata i hait tru.


(3) Pasin pamuk i ken stat. Tasol dispela em i no bikpela wari insait long ol ples swata. Dispela kain bisnis ol i save mekim long ol arapela hap.

(4) No gat gutpela kaikai; no gat inap kaikai. Dispela em i bikpela wari tru - long wanem planti skwata tumas i no gat wok. Ol pikinini i save go bun nating.

(5) I no gat gutpela wara na toilet na rot.

(6) Planti tok kros na pait i save kamap namel long papa bilong graun na ol skwata. Long sampela ples ol skwata i save baim gut papa bilong graun na peim rent. Long sampela arapela ples ol skwata i no baim papa - na em i no inap rausim ol.


(i go moa long pes 12)



SAPOS YU LAIKIM BATERI TRU YU BAIM DISPELA KAIN

KASET BILONG MAXELL

Em i namba wan tru



BATERI BILONG MAXELL

Em i save wok longpela taim tru



yu ken baim long :

HAGEMAYER (P.N.G.) PTY. LTD.

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 63, RABAU
PHONE: 922633

P.O. Box 90, LAE
PHONE: 423200

P.O. Box 11, MT' HAGEN

ILEKSEN TRABEL

Wanpela liklik kantri long Saut Pasifik, ol i kolim Nu Hebrides, i bin gat sampela politikal trabel inap long sampela mun nau.

Nu Hebrides em i wanpela kantri klostu long Papua Niugini. Em i no kisim yet independens bilong em. Em i stap yet aninit long tupela gavman: Frans na Englan. Dispela tupela gavman i bin bosim ol inap 72 yia nau.

Inap long sampela mun nau, ol pipel bilong Nu Hebrides i laik rausim gavman bilong Frans na Englan na kisim independens bilong ol.

POLITIKAL PAIT

I gat tupela bikipela politikal pati i wok long pait nau insait long Nu Hebrides. Bikipela tru long tupela yia ol i kolim Vanuaaku Pati. Ol memba i tok, dispela pati em i bilong ol pipel stret bilong Nu Hebrides. Dispela hap tok "Vanuaaku" em i min olsem "ples bilong mipela".

Ol pipel bilong Nu Hebrides i wankain na i luk olsem ol pipel bilong Papua Niugini. Namba bilong ol inap long 96,000.

ILEKSEN

Long 29 Novemba long yia i go pinis ol i bin redi long mekim nupela nesenel ileksen bilong palamen bilong ol. Tasol bikipela trabel i bin kamap long dispela taim. Ol pipel i sapotim Vanuaaku Pati i no go long vot long dispela ileksen, long wanem ol i no amamas long arapela grup i bihainim pasin politik bilong gavman bilong Englan na Frans. Ol i tok dispela tupela kantri i no laik givim independens hariap long ol Nu Hebrides. Ol i tok tu, tupela gavman i mekim pasin nogut long paulim-tingting bilong ol pipel. Ol i tok ol pipel yet i mas kirapim gavman bilong ol.

Long de bilong ileksen lain bilong Vanuaaku Pati i bin tambuim ol memba long go vot. Ol i sanap strong long bilip bilong ol na i tok, Vanuaaku Pati yet bai kirapim independen gavman bilong ol Nu Hebrides pipel. Long dispela taim Vanuaaku Pati i baisapim plak bilong em yet long sampela hap bilong kantri na ol i givim nem "Provisenel Gavman bilong ol Pipel" long lain bilong ol. Dispela i min - dispela nupela gavman bilong ol i bilong ol pipel yet na i senisim gavman bilong bipo.

VANUAAKU EGENS

Taim ol Vanuaaku Pati i haisapim plak bilong ol, ol sapota bilong gavman bilong Frans i bin go bagarapim bung bilong ol. Wanpela pait i kamap na ol man i holim ston na plang na hap diwai. Wanpela ston i sutim het bilong wanpela distrik ofisa bilong gavman. Ol plisman i sutim smok katres i go long lain bilong ol paitman, na 5-pela man i kisim bagarap long dispela trabel.

NUPELA GAVMAN


Bihain long ileksen long mun Novemba gavman i bin kirapim wanpela kain palamen ol i kolim Reprisentative Asembli. Na tu ol i votim wanpela sif minista na makim ol minista bilong em. Nem bilong sif minista: George Kaltoi Kalsakau.

Lain Vanuaaku i no amamas long dispela nupela gavman. Ol i tok ol lida bilong dispela gavman i no makim tru laik bilong ol pipel bilong Nu Hebrides. Ol i olsem oposisen pati bilong gavman na lida bilong ol em wanpela lokal Engliken pasto: Walta Lini.

Gavman bilong Frans na Englan i promis pinis, bai Nu Hebrides i kisim independens long yia 1980.

NEW HEBRIDES

50 mls



MANGAL BILONG OL WANSOLWARA

(stori i kam long pes 3)

Fopela politisen ya ol i bilong namba wan Haus ov Asembli bilong Nu Hebrides. Dispela asembli ol i bin kirapim long Janueri bilong makim selp gavman bilong ol.

Sif Minista Mista em Mista George Kalsakau i lida bilong grup i bin kamap na tu Pater Gerard Leymang (Minista Bilong Sosol Sevis), Mista Luke Dini (Minista Bilong Transpot na Komyunikesen), na Mista Adrian Malene (Minista Bilong Komes na Industri).

Bihain long 4-pela visita i bin bungim ol hetman bilong PNG, Sif Minista

George Kalsakau i bin tok grup bilong em i amamas long kam toktok hia long PNG wantaim ol lida. Em i tok ol i bin lainim planti samting hia. Long wanem Mista Somare i bin stori long ol long olkain politik na developmen PNG i bin bihainim bilong kisim independens.

Ol i bin toktok long ol wari bilong independens, pasin bilong wok wantaim kolonial gavman, foren rilesens na tret, ol lo bilong graun, pasin bilong provinsal gavman, wok turis na ol kain kain samting olsem.

Sif Minista Kalsakau i tok, dispela miting wan-

taim ol gavman lida bilong yumi i bin helpim ol tru. Ol i pilim olsem Nu Hebrides na Papua Niugini i olsem tupela brata stret.

Gavman bilong Mista Kalsakau i gat sampela bikipela hevi tu i stap. Em i no sindaun gut wantaim Oposisten Pati, em ol i kolim Vanuaaku Pati. Wanpela pris bilong Engliken Sios, em Pater Walter Lini i ranim. Sif Minista Kalsakau i tok em i no laikim tru pasin bilong dispela pati long wanem ol i save mekim planti trabel tumas. Em i tok em i no amamas long pasin bilong sampela sios long helpim Vanuaaku



PALAMEN NA BUAI

Dia Edita - Yes mi laik autim liklik tingting bilong mi. Olgeta taim mi ritim Wantok na mi harim planti man tumas ol i komplen long kaikai buai na ol i save tok long gavman i mas rausim buai.

Mi pilim dispela em i no stret tumas. Buai i no kam long arapela kantri. Nogat. Buai em i bilong dispela kantri. Bipo, bipo yet ol tumbuna i planim kaikai na nau i stap yet. Buai em i kaikai tru bilong Papua Niugini.

Olsem na laik mi, mi laikim olsem i moa gut long olgeta memba bilong palamen ol i mas pasim wanpela mosen na makim namba bilong buai ol man i mas baim long ten toea o 20 toea. Long wanem tru tumas ol man bilong salim buai ol save salim wanpela buai long 10 toea em i no stret tumas.

Tru ol man bilong salim buai ol i tok pe bilong ol samting long stua i go antap. Olsem na ol i putim pe bilong buai i go antap. Tasol buai i no kam long sip na balus long narapela kantri olsem rais na tin mit. Buai em bilong hia tasol.

Maket bilong buai i win tru long arapela maket. Sampela manmeri ol save kaikai buai tumas. Ol i save lusim K2 samting long baim buai bilong wanpela de tasol. Long wanem pe bilong buai i go antap tumas.

Pe bilong stua i go antap em i stret long wanem gavman bai kisim hap mani long ol stua. Tasol pe bilong buai i go antap em gavman i no kisim hap mani long en. Olsem na i

moa gut long ol memba bilong palamen ol i mas pasim wanpela mosen na makim namba bilong buai stret na ol man bilong salim buai ol i mas salim long namba stret.

Tatip Tuwab,
Lae.

HELPIM PAMUK

Dia Edita - Salim Kondom, em i no gutpela tru long tingting bilong ol pipel na ol sios lida bilong ol kain kain misin insait long kantri.

Yumi save ol yangpela man na meri ol i laikim dispela samting. Long wanem ol i putim kondom pinis, orait ol isi tru long pamuk wantaim ol yangpela meri long ples.

Taim ol i no gat kondom, orait ol i pret, long wanem, mi pamuk wantaim em, bai em kisim bel na mi inap kisim kot o trabel samting.

Tasol ol stuakipa i salim kondom long ol pipel, sori tru em ol isi tru long pamuk wantaim ol marit meri na ol yangpela meri long ples nabaut. Ol i ting dispela samting em i gutpela, tasol em i bagarapim sindaun bilong ol pipel.

Paulus Waik,
Erave/S.H.P.

HAILANS MAN LONG SOLOMONS

Dia Edita - Mi wanpela man bilong hap long Enga Provins. Na mi save wok long Bougainville Kopa.

Na mipela sampela man i save wok long kampani mipela i save i stap gut na mipela i no ting long wok-

im trabel o samting olsem. Tasol sampela man na meri ol i stap nabaut nating long Bougainville na ol i save wokim trabel. Na ol i kolim mipela ol Hailans tasol wokim trabel. Ol i kolim mipela olsem na sampela gutpela man bilong wok na ol save i stap gut, em ol kisim bikpela sem long dispela samting.

Kaki Kia
Panguna.

HUSAT MAS BAIM KATEKIS?

Dia Edita - Nau mi laik autim sampela bel hevi bilong ol katekis o pasto.

Mi save lukim long planti hap bilong Papua Niugini, ol katekis i save mekim hatwok tru. Ol i save lainim tok bilong God long peris bilong ol yet.

Na bihain ol i save goaut long wan wan ples na autim tok. Na bihain misin i singaut long wanem wok tarangu ol i save harim tok tasol na mekim. Na tu wanem kain kos bilong ol misin i save kamap long Port Moresby, Rabaul, Lae, Wewak, Madang, o wanem hap ol i save go tasol. Tarangu meri, pikinini ol i save sindaun tarangu i stap.

Taim ol i save kam bek ol i ting ol i kisim sampela gutpela samting. Tasol nogat. Ol i save popaia. Olsem na mi ting gavman mas helpim liklik mani long misin bai em i baim ol katekis. Na mi ting ol i save kisim K20 o K25 em i no inap long ol. Em mani bilong baim kaikai inap wan wik tasol. No gat mani bilong baim bilas.

Olsem mi save lukim pablik sevan i kisim K95, K75. Em tasol bel hevi bilong mipela ol katekis. Husat laik bekim o skruim tok bilong mi, rait long Wantok Niuspepa.

Samuel Wangikara,
Rabaul.

PASIN MUMUT LONG HAGEN

Dia Edita, - Mi laik tokaut long olgeta man, meri, na pikinini bilong Mount Hagen. Mi save lukim ol man, meri, na pikinini olgeta taim Mande inap long Fride, i save kisim ol pipia long rabis long hap long Hagen Tech.

Plis, ol kankes na ambukes, maski long go na mumutim ol pipia kaikai, na ol hap ain nabaut long ples bilong tromoi pipia. Nogut yupela kisim sik long dispela pasin. Yupela i no pik na dok, o kakaruk. Yupela i man na meri i gat tingting.

Olgeta taim long moning, samting olsem 7:30 bai ol man, meri, pikinini, wantaim planti pik bai pulap tru long wetim kaunsil ka long kisim pipia na tromoi. Asde yet ol i ran, olsem ol i nogat tingting, long painim pipia samting long taim ka i kapsaitim pipia.

Mi lukim olsem na i no stret tumas long tingting bilong mi. Man bai yu lukim skin bilong ol i wait long graun na karim ol hap kaikai, na hap ain, dram. Ol i save kisim i go long ples bilong ol.

Tingting bilong mi ol-

sem, mi laikim ol viles kot na pis komiti i mas traim na stapim o tokim ol pipel ol i no ken mekim olsem, nogut ol i kisim sik nogut, o samting olsem. Na tu ol pik bilong all too all i mas wokim all banis bilong pig.

Man, mi lukim all pik tu ya ol i kaikai ol pipia kaikai na pat nogut tru. Mi les long kaikai dispela kain pik i save kaikai rabis kaikai long pipia, nogut mi kisim sik nogut bilong pik.

Orait toktok bilong mi pinis.

Mr. Nick S. Avene.
Mount Hagen.

DRAI NA KOPRA

Dia Edita - Hia nau wanpela liklik wari bilong mi.

Mi save lukim long ol taun. Ol i save salim kokonas long 20toea long wanpela. Mi lukim em i no stret. Plis, yu save yumi ol nambisman i gat kokonas. Yumi i gat buai, daka. I tru, ol hap bilong hailans, em i nogat. Em i kol ples.

Nau wanpela liklik askim bilong mi i go olsem: Yu inap kisim wanpela drai kokonas na i go givim long Kopra Maketing Bot na kisim 20toea? Mi laik save na askim yupela.

Joris Mariuen,
Yangoru/Is Sepik.

OL BAS I GO LONG HAILANS

OLGETA DE

GOROKA - LAE: olgeta de

LAE - GOROKA: olgeta de

GOROKA - HAGEN: Sande, Tunde Fonde, Fraide

HAGEN - GOROKA: Mande, Trinde, Fraide, Sarere.

PRAIS: Goroka/Lae = K15
Goroka/Hagen = K13

RING: Goroka: 72.1637
Lae: 42.4377 Ext. 1

STESIN: Jumi Cabco
Lae Maket kona
Air Corps Rd.

TERRITORY NET SUPPLIES
Box 5860, Boroko, Tel. 25.6700

Namba wan ples bilong baim olkain samting bilong wokim umben: string, rop, twain, let, flot, nil bilong samap.

Rait na askim mipela long prais bilong ol.

Long Janueri 21, Sinod bilong Luteran Sios i bin makim gen Pasto Zurewe Zurenuo i het bisop bilong Evenjelikal Luteran Sios bilong Papua Niugini (ELC-PNG) inap 4-pela yia gen.

Bisop Zurenuo i bin winim dispela wok bisop bipo yet long 1973 inap nau. Nau ol i makim em gen bai i stap bisop inap long yia 1982.



Bisop Zuernuo i kam long ples Finschhafen long Morobe Provins. Em i gat 58 krismas bilong em. Zurewe Zurenuo i bin stat wok insait long Luteran Sios long 1953 long Finschhafen. Em i bin wok pastaim olsem Eksekutiv Seketeri bilong Sattelberg Seket. Long dispela taim em i bin skul liklik na lainim tok Inglis.

Long yia 1961 Luteran Sios i bin salim em i go long Bavaria Luteran Sios long Jemani bilong lainim wok lida long sio. Em i bin stap 6-pela mun na i lainim tu planti pasin samting bilong ol Yuropien pipel. Taim em i kam bek long Papua Niugini long 1962 ol i bin makim em olsem Eksekutiv Sekreteri long Sinod bilong Luteran Sios. Em i bin holim dispela wok inap long 1973, taim Sinod i bin makim em olsem bisop Zurenuo em i bin pes o namba wan man tru bilong Papua Niugini long holim wok bisop long Luteran Sios. Long 1966 yet em i bin kisim odinesen bilong kamap olsem pasto long sios.

Ol pipel bilong Papua Niugini i ting Bisop Zurewe Zurenuo i sanap olsem wangepa bikman na lida long komyniti. Planti taim bipo em i bin tokaut long planti bikpela tingting bilong en long ol kain developmen long dispela kantri. Em oltaim sapotim gutpela wok bung wantaim bilong sios na gavman bilong kirapim ples. Em i save givim tu planti gutpela tok long ol pipel bilong Papua Niugini bai ol i strong long bilip Kristen bilong ol na wok hat wantaim dispela bilip bilong mekim ol wok developmen i go het.

Bisop Zurewe Zurenuo



Poto long raithan i soim Bisop Zurenuo long opis bilong em long Lae. Na poto aninit i soim em na meri bilong em taim Asbisop Coggan, hetman bilong Englikan Sios i kam lukluk raun long P.N.G.



Aveling Barford Pacific Pty. Ltd. For your civil engineering, agricultural and domestic machinery.

Graders

Weight range 11,000-19,000 kg
All Wheel Drive and Steer
Conventional
Leaning Wheel
Hydraulic Controls
Powered by Leyland or
G.M.
Powershift or Standard
Transmission




Front End Loaders

Bucket Sizes of 1.3 cu.
metres to 3.82 cu. metres
Pivot or rigid frame available
Logging Attachments

Rollers

Vibratory Rollers
Self-propelled or Towed
Hydrostatic Drive
Pivot Steer
Asphalt Conversion
Padfoot Roll



Head Office: Ume St., Gordon, Port Moresby,
P.O. Box 6457. Phone 25 7166. Telex 22206.
Lae Depot: Morobe Ave, P.O. Box 1191, Lae.
Phone 42 4188. Telex 42411.

ENGLAN GAT 80 BLAKSKIN SIOS

Samting olsem 80 kain kain sios bilong ol blakskin bilong Englan i bung wantaim nau insait long wanpela kaunsil bilong ol sios bilong ol Afrikana Wes India.

Ol i kain kain Kristen sios na olgeta wantaim i gat 125,000 memba na 2000 deliget o tokman bilong ol i bin bung long London. Dispela lain i no bin bung yet insait long bikpela kaunsil bilong ol Kristen sios long Englan.

Ol dispela sios bilong ol blakskin grup, ol i man bilong mekim kain kain wok tru. . . long helpim ol sios bilong ol, long helpim ol memba long painim haus na wok na long helpim ol long taim ol i kot. Planti dispela sios i winim Kristen wok bilong ol wait-skin Englan.

Ashton Gibson, wanpela lida bilong Methodis sios bilong ol blakskin i tok ol-

sem: Ol sios long dispela kantri ol i yusim planti taim long raitim ol naispela tok, na mekim planti wari long ol trabel i stap longwe long ol arapela kantri. Tasol em i aipas na i no lukim planti wari na trabel i stap namel long ol Kristen hia long dispela kantri yet. Tasol mipela blakskin i lukim na i filim. Mipela i tok olsem: man i gat bodi na i gat spirit. Tupela i wan samting; i pas wantaim. Yu no ken kamap long spirit, sapos yu no wari liklik long bodi na sindaun bilong ol pipel i gat spirit.

Tasol insait long dispela grup bilong ol blakskin sios, i gat arapela kain tingting tu. . . . Sampela i ting Gutnius bilong Jisas i samting bilong spirit tasol, na i no wari long bodi.

wantok

Papua New Guineans' own national weekly in Melanesian Pidgin

Editorial Offices:

Box 1982
Boroko
Phone: 25.2214
25.2552
Telex: NE 22213

Branch Offices:

Wewak
Phone: 86.2479

Wabag
Box 111

Australian Advertising Representative:

Kevin Engel
8-Duraba Pl.
Caringbah (2229)
N.S.W.
Phone: 525.6263

Subscription rate:

Annual: K8.00

SKWATA WARI

(i kam long pes 8)

(7) Ol skwata i pret - pret bai papa bilong graun i rausim ol nating.

(8) Ol papa bilong graun i bel nogut, long wanem, ol skwata i bilong planti ples, na i no wantok bilong em, na i bilong planti kain lotu.

(9) Planti taim ol pipel i ting ol skwata pipel em ol raskal tasol na man bilong mekim trabel. Tasol long planti ples em i no tru.

(10) Planti samting olsem pasin bilong bringim paip wari i kam na wokim rot i go long ples bilong ol skwata i no save kamap, long wanem, dispela graun ol i sindaun long en, em i bilong gavman o bilong ol man bilong bipo. Na Siti Kaunsil i no save wari long en.

(11) Sampela taim siti na Hausing Komisin i makim sampela ples-we ol skwata i ken kam na kisim graun na wokim gutpela haus bilong ol, tasol ol i no laik. Ol i gat laik long sampela ples stret. Ol i laik sindaun wantaim ol wantok. Planti i pret long sindaun namel long ol arapela kain pipel i no wantok.

(12) Ol pipel bilong nambis ol i laik sindaun klostu long solwara. Ol man bilong maunten ol i pilim gut tru sapos ol i sindaun antap long ol kil nabaut long taun na wokim gaden long ol sait bilong maunten yet.

INDONESIA STORI


(i kam long pes 7)

sem 100,000 manmeri i kalabus bikos ol i bilong narapela politikal pati - hia em Komunis Pati, em dispela i laik bagarapim na kapsaitim gavman bipo. Indonesia i pret yet, i ting sampela smolpela grup komunisi i haiti stap nabaut yet na i ting planti dispela

kalabusman i insait wantaim ol yet.

Sampela man i ting gavman i lusim planti kalabusman nau tasol, bikos nupela ileksen i klostu na ol kalabusman i ken pilim gavman i belgut long ol na givim vot gen long gavman bilong Suharto.

STORI BILONG TULTUL TITAN



PLANTI OL WANTOK LONG HAILENS I SAVE KAM LONG TITAN KAMPANI LONG LAE LONG BAIM BANIS WAIA. TASOL NAO OL I KEN BAI LONG DISPELA PLES:

BANZ

Farmers & Settlers

GOROKA

BP Stoa
Steamship Stoa
Summer Scales &
Lambert
Farmers & Settlers
New Guinea
Pastoral Supplies

KAINANTU

Jascar Ltd

KUNDIAWA

Steamship Stoa
Namasu

MENDI

Sohi Gilsenan

WAPENAMANDA

Waso Ltd.

MT. HAGEN

. BP (NG) Ltd
. N.G. Co. Ltd
. Steamship
. New Guinea
Pastoral Supplies

Titan (NG) Pty Ltd. P.O. Box 25 Lae Ph 423988, 423497

Watpo taragau makim Hagen

Long bipo tru i no gat wanpela man i stap long ples Eglem. Planti meri i stap long dispela ples. Wanpela taim san i kamap na i gutpela taim bilong i go long bus na painim kapul. Nau ol meri i tingting long i go bus na painim rop bilong wokim bilum. Ol i redi long go nau ol i kisim planti kaukau na i slip.

Tumora moningtaim tru ol i kirap na wokabaut i go long bus bilong painim rop bilong wokim bilum. Ol meri i stat long wokabaut i go long bus, ol i kamap long hil bilong mounten na skelim sampela i go long arere bilong wara. Na sampela meri i go long bus nambaut. Wanpela meri i go long arere bilong wara em i kisim rop i go, na i lukim haus bilong wanpela pisin i stap. Meri ya i kisim dispela haus pisin, i lukim wanpela kiau bilong pisin i stap. Nau meri i kisim dispela kiau ya. Nogat, em i bruk. Nau meri i kisim dispela na kaikai.

Bihain em i kisim sampela rop na i kam painim ol wantok, na ol i kam long haus bilong ol. Em i no tok save long ol brata

bilong em long em i kaikai kiau. Em i kam tasol long haus. Na 3-pela mun i go pinis na wanpela meri bel bilong em i solap nau. Ol brata bilong em ol i askim em, brata yu kaikai planti an bel i solap. Meri i tok nogat.

Ol i stap i go na winim 9 mun. Meri i klostu karim pikinini, i pilim pen, na i mekim kain kain pasin. Em i slip long raun, rabim graun long skin bilong em, krai na klostu i laik indai nau. Ol brata bilong em i no lukim wanpela kain pasin olsem bipo. Ol brata bilong em ol i tok, Ating em i laik i dai na mekim olsem. Nau ol i lukluk i stap, na meri wantok ya i karim pikinini man. Ol meri i lukim dispela pikinini man, ol i guria nogut tru. Olgeta meri i amamas tru long dispela pikinini man. Ol i kis long meri i karim pikinini man.

Nau ol i kisim dispela na lukautim i stap na winim 3-pela mun. Mama bilong en na brata bilong em, tupela i kisim dispela pikinini i go long gaden. Tupela i putim pikinini long as bilong diwai long ples kol, na tupela i kisim kumbaka i stap.



Wanpela taragau i pilai i kam sindaun long han bilong diwai, pikinini i slip long en. Tupela mama i lukluk i stap. Wantu, taragau i pilai i kamdaun na kisim dispela pikinini man long tupela lek bilong en na pilai i go antap na sindaun long han bilong diwai. Tupela mama i bikmaus na singaut strong. Tasol taragau i tok, "pikinini bilong mi nau. Mi kam kisim i go. Yutupela i go long haus bilong yutupela."

Taragau i toktok na i sindaun yet long han bilong dispela diwai. Tupela mama i krai na tromoi stik

i go antap. Tasol i no inap. Bikmaus tasol i no inap. Klostu san i godaun, taragau i tokim tupela mama: "Yutupela i go long haus, pikinini bilong mi nau mi yet kisim i go."

Tupela mama i krai sori nogut na rabim graun long pes na i kam long haus na stori long ol arapela meri olsem: Long taim mipela i go long bus bilong painim rop bilong wokim bilum, long dispela taim mi kisim kiau bilong taragau. Ating long dispela mi karim pikinini man na taragau yet i tokaut na kisim pikinini i go.

Ol mama i krai sori i stap. Bihain ol i mekim pati long pikinini bilong ol yet i mekim wok long gaden bilong lusim tingting long pikinini bilong ol na i stap nating.

Taragau i kisim dispela yangpela boi i go long bus na i putim long hul bilong diwai. Taragau i go raun long bus na kilim kapul, kisim i kam, givim pikinini boi bilong en. Oltaim taragau i mekim olsem i go na yangpela boi i kamap bikpela. Nau pikinini i no inap moa slip long hul bilong diwai. Olsem na klostu san i go daun, tara-

gau i bringim yangpela boi i kam longples bilong ol mama i stap long en. Ol mama i mumuim kaokao pinis na i kam ausait na mekim kain kain stori i stap.

Nau ol i harim wing bilong pisin i pairap. Ol i kirap na lukluk i stap ya taragau i bringim yangpela boi kam klostu long ol meri istap long en, ol mama i kirap nogut tru na holim-pas dispela boi. Na taragau i pilai i go long bus.

Nau dispela boi kamap bikpela na i maritim ol mama bilong em yet na karim planti pikinini man. Dispela lain man ol i save kolim Munjika. Ol i slip klostu long Tiria insait long W.H.P.

Taim ol dispela lain i laik singsing, ol i save pasim gras bilong taragau. Ol man i kamap patpela na naispela tru. Ol arapela lain man i save tok, ol dispela lain Mujika i kamap long taragau na i kamap gutpela.

Mr. Zawie Kaepni
Mt. Hagen W.H.P.

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:

ADRES BILONG YU:

Salim sek o mani oda inap long K8.00 wantaim dispela tiket i kam long:

**WANTOK
BOX 1982
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.

WIRUI PLES BALUS BILONG BIPO

Inap 39 yia, wanpela bikpela samting klostu long taun Wewak long Is Sepik em i Wirui ples balus. Nau gras i karamapim em.

Poto long raithan i soim Pater Ivo Ruiter, S.V.D., em het pailot bilong ol balus bilong Katolik Misin (Wirui Air Services) i sindaun long wanpela Dornier wan ensin balus na i redi long flai i go long bus long ples Tau. Em i long de namba 30 bilong Jun 1976. Em i las taim wanpela balus i yusim Wirui ples balus. Gavman i pasim em long de namba 1 bilong Julai, 1976. (Poto bilong em i stap daunbilo.)

Dispela ples balus i gat bikpela nem na namba. Katolik misin i bin wokim em long graun bilong em stret long 1937. Long 1939 gavman i baim na i kisim na i ranim. Woa i kamap na ol Japan i yusim em olsem pasis bilong ol smolpela balus bilong pait.

Inap 5 yia samting bihain long woa, Wirui wanpela i ples balus bilong Wewak na olkain balus inap long DC3 i bin yusim em. Mista Bobby Gibbes i statim Gibbes Sepik Airways hia. Ol balus bilong MAL na MAF na Wirui Air Services na Qantas i go i kam long dispela ples balus tasol. Bikpela hetman bilong TAL tude, em Mista Dennis Buchanan, em i bin stat wok long dispela ples balus tasol olsem wanpela kago boi bilong Mista Gibbes. Long yia 1960, Wirui ples balus i winim olgeta arapela ples balus insait long PNG long namba bilong ol balus i kam daun na i goap long en, long wan wan de.

Pater Ruiter na Bisop Arkfeld na Bobby Gibbes i win long ol arapela pailot i bin yusim dispela ples balus.



PAIT I KAMAP

(Eksodas 16: 11 - 17: 11)

Ol pipel i bel nogut na i putim hevi long Moses, long wanem ol i no gat kaikai. Em i tokim ol: Tude yet bai yupela kisim save....



Long apinun planti pisin moa i kam long kem



Inap kaikai nau.



Long tulait nau ol pipel i painim wanpela waitpela samting i karamapim ol eraun.




149

Tasol tumora



Long de namba 6 tasol ol i bungim kaikai inap 2-pela de. Long Sabat kaikai i no pundaun.



Tasol ol sentri bilong ol Hibru i lukim ol



Moses i singautim ol man bilong pait



Ol i pait inap wanpela de olgeta na ol i no win yet. Tasol taim ol soldia i lukim Moses i holim stik antap, ol i save bai ol i win...olsem na ol i pait moa.



Tasol han bilong Moses i hevi na i go daun



Sapos olsem, wantu ol soldia bilong ol Hibru i lusim strong..



Created by permission of the David C. Cook Foundation. Copyright 1973, David C. Cook Publishing Co. All rights reserved.

SPIT NA SPAK I KILIM MAN

LUKIM GUT DISPELA POTO OL PLISMAN I KISIM



NOGUT NEKS TAIM EM I YU TASOL